



讀易散記——益卦彖辭

■ 自明

「天施地生，其益无方。」

虞翻注：「乾下之坤，震爲出生，萬物出震，故天施地生。陽在坤初爲无方。日進无疆，故其益无方也。」

依李氏《疏》解釋。否卦上乾下坤，乾上九，下之坤初，成爲益卦。否乾爲天，乾下之坤，爲施，故曰「天施」。《說卦傳》：「帝出乎震。」故爲出。震在東方，是春生之時，故爲生。又《尚書·武成

篇》：「月三日，哉生明。」亦爲生。《說卦傳》：「萬物出乎震。」是故虞氏此注：

「萬物出震。」萬物資始于乾（乾《象傳》文），而資生于坤（坤《象傳》文），故此益卦《象傳》曰：「天施地生」也。坤《文言傳》曰：「至靜而德方。」故虞氏此注云：「陽在坤初爲无方。」惟其「日进无疆。」是以「其益无方。」此是損上益下，所以爲益。

「凡益之道，與時偕行。」

虞翻注：「上來益三，四時象正。艮爲時，震爲行，與損同義，故與時偕行也。」

依李氏《疏》解釋。注「上來益三」者，三上兩爻易位，即成既濟。既濟上坎爲冬時，下離爲夏時，益下卦震爲春時，益卦反之即是損卦，損內卦兌爲秋時。是故虞注：「四時象正。」損卦上體艮，艮《象傳》：艮，動靜不失其時，故「爲時」。《說卦傳》震爲作足，故「爲行」。虞注「與損同義」者，損卦《象傳》曰：「損益盈虛，與時偕行。」虞彼注云：「損二之五，益上之三。變通趨時。」（《繫辭下傳》文）。故與時偕行。」是其義也。

《象傳》曰：「風雷，益。君子以見善則遷，有過則改。」

虞翻注：「君子謂乾也。三之上，離爲見，乾爲善，坤爲過，坤三進之乾四，故見善則遷。乾上之坤初，改坤之過。體復象，復以自知。故有過則改也。」

依李氏《疏》解釋。《子夏傳》曰：「雷

以動之，風以散之，萬物乃益。」《易緯稽覽圖》曰：「降陰下迎，陰起合和而陽氣用上薄之則爲雷。」鄭康成注云：「陽氣，風也。」是風之益雷，自否上爻下之初，而爲益。又虞氏注《繫辭下傳》云：「益萬物者，莫若雷風。」故此《象傳》曰：「風雷益。」虞注「君子謂乾」者，是謂否卦之乾。益卦三上兩爻失位，易位則下體成離，《說卦傳》：「相見乎離。」故虞注云：「離爲見。」乾《文言傳》曰：「元者善之長也。」故爲善。坤《文言傳》曰：「積不善之家。」故爲過。虞注「坤三進之乾四」者，否上九已之初，而爲益，否六三進居四，四陰得位，故曰遷善。否乾上之坤初，坤體毀，故云：「改坤之過。」益初至四，是互體復卦象，《繫辭下傳》曰：「復以自知。」又：「子曰：顏氏之子其殆庶幾乎。有不善未嘗不知，知之未嘗復行也。」故：「有過則改也。」遷善改過，益莫大焉。